



Qanoq iliorluta kulturitoqarput aallaavigalugu tamat oqartussaaqataanerannik sanarfinninnitsinni inuttaasut peqataatinneqarnerat sunniuteqaqataanerallu pitsaanerpaamik qulakkeersinnaaneripput pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaqaq Mariane Paviasen, Inuit Ataqatigiit)

Qujanaq Inatsisartunut ilaasortamut Mariane Paviasen-imut apeqquteqaat aallaavigalugu oqallisissiatut siunnersuuteqarneranut.

Aallaqqaasiutitut oqartariaqarpunga, oqallisissiap qulequtaa oqallisissiallu imarisaa naapertuuppallaanngitsut. Oqallisissiaq qulequtaa siammasissorujussuuvoq, imarisaanili annikitsortaannaanik ilanngussuilluni. Taamaattumik oqaatigeriissavara, oqallisissiap qulequtaa pingaarnertut isummorsorfigissagakku.

Siullermik tamat oqartussaaqataanerata maannakkorpiaq killiffigisaa takulaartigu. Qinersiartortartut ajoraluartumik ikiliartorput. Ilaa soormita?

Tamanna pillugu qinersisartunik pisortatigoortuunngitsumik oqaloqateqaraangama, tikkuakkajuppaat, inuiaqatigiinni unaminartunut ilungersunartunut naammattumik suliniartoqanngitsoq soorlu assersuutigalugu meerartatta kinguaassiuutitigut atonerlunneqarnerannut, persuttaanerit-toqutsisarnerillu annertuut aammalu alianartumik imminut toquttarnernut annertuunut. Qinersisartut aamma isumaqarput, inunnut tunngassuteqartut amerlavallaartut, qinikkanut tatiginnikkunnaariartornermut, aammalu inuttaasut isumalluarnerat politikkerillu pilersaarutaat ungasillingaluttuinnarsimasut.

Tamakku assersuutiniq taasaqalaarusuinnarlunga, tusartarsimasannut. Isorinnernermi aamma takussaavoq ersarissorujussuullunilu inuit naapittarfianni, assersuutissarpasuaqarmat isorisanik tigussaasunik isummorsornernillu. Nuannersut nuanniitsullu. Ajunngilluinnarpoq, kinaluunniit pisinnaatitaaffeqarmat isummorsornissaminik aammalu akerliussinnaatitaalluni. Assersuut kingullertigut pisoq akerliussutsimik takutitsinersuaq nerisassanut peqqinnanngitsunut akitsuutit qaffanneqarmata. Tassani NAAMMALEQAAQ-kkut, akerliussutsimik takutitsinermit tassunga siuttuupput, akitsuutit qaffanneqarnerisa kingunerisaannik akit qaffannerannut akerliussut.

Politikkikkut qularikujuppara akerliussutsimik takutitsinermit siuttuusut ilumut inuttaasut sinnerlugit taama iliornersut imaluunniit politikikkut partiimi soqutigisat siuarsarniarlugit politikikkut misiliinerunersoq. Sanilliusilaarlanga. Maanakkorpiaq akit qaffariartornerat nalaapparput, tamatsinnik eqquisoq ilaqutariinnullu ataasiakkaanut aningaasartuuteqarnerulersitsisoq. Tamanna ilaqutariinnut isasoorutaaneruvoq sukkunut, imigassamut tupamullu akitsuutit taamani qaffanneqarnerannit, taamani akerliussutsimik takutitsisoqarmat. Naammiuku taakku NAAMMALEQAAKKUT? Siunertarinnginnerpaat utoqqaat atugarisaasa pitsanngorsarnissaat, ilaqutariit meerartallit atugarisaasa pitsanngorsarnissaat, pissakinnerit atugarisaasa pitsanngorsarnissaat?



Aamma isumaqarpunga, pingaartuusoq tamat oqartussaaqataanerisa sanarfinerannut, Naalakkersuisut ammasuuullutillu ersarissuliornissaat ilisimatitsisarnissaallu innuttaasunillu oqaloqatiginnissinnaanissaat. Taamaattoqanngilluinnarpormi.

Naalakkersuisooqatigiit nutaat ikkummatali tusagassiuutit arlallit nipaannerujussuaq pakatsissutigisorujussuaat. Nunanut allanut- sillimaniarnermullu politikkimut tunngatillugu nipaanneq, coronap nalaani aqutsinermi nipaanneq, nipangersimaannarneq coronap ajornartoortitsinerani Ruslandillu Ukraine-mut sorsulerneratigut kingunerluutinut nalorninerujussuarmut.

Naalakkersuisunut ilaasortat toqqoqqapput ilanngutassiortullu ilumoortunik apeqqutaannut akiumanngisaannangajallutik. Isumaqarpunga tamanna tamat oqartussaaqataanerannut ajornartorsiutaasoq imaannaanngitsoq. Tusagassiuutit akutsunngitsumik oqaatigisarpaat, Naalakkersuisunut oqaaseqartitsiniarnerigaluatik iluatsinneq ajortut. Tusagassiuutit sugaluarpataluunniit. Tassa ima isikkoqarpasippoq, Naalakkersuisut attaveqarniarnerat tunngaviusumik ajornartorsiutaasoq. Tamat oqartussaaqataanerat pitsaasoq siuarsarneqassaaq tusagassiuutinit kiffaanngissuseqartunit isornartorsiuisunillu, pissaanermik tigumminnittunik eqeersimaartitsisoq nunap inatsisaannik tamanik malinninnissamut qulakkeerinnittussatut.

Inatsisartoqarnermi ingerlatsineq qivialaassagutsigu, ajoraluartumik Naalakkersuisut arriisaarnermikkut attaveqartannginnermikkullu tamat oqartussaaqataanissaraluannik kigaalatitsisartut. Naalakkersuisut § 37-apeqqutinut akiniaasaartarput, akutsunngitsumillu akissutaat atorneqarsinnaassanatik, ikerinnarmiillutillu tigussaasuusannnginnamik. Sulinermut kingaalassutaasarput isummerfigisassatut siunnersuutunik tigussaasunik sanassatilluni. Taamaapporlu Inatsisartuni ataatsimiititalianit aperisoqartillugu. Paamaarussinerup uani kingunerisarpaa, siunnersuutit kinguartittariaqartarneri kingusinaartarnerilu. Ajoraluartumillu aamma kingunerisarlugu, ataatsimiititaliat piffissaqarneq ajornerat isumaliuutissiissutip sukumiisumik suliarinissaanut, tamannalu inatsimmik pipallatamik sananermik kinguneqarsinnaalluni.

Taamaattumik qularutigineqassanngilluinnarpoq, qinikkat tungaanniit iliuuseqarluarsinnaagaluvaqigatta tamat oqartussaaqataanerannut sanarfinninnitsinni. Naalakkersuisut allatut ajornartumik ilungersornerusariaqarput Inatsisartut suliaannik ataqqinninnissamut aammalu innuttaasunik attaveqarnermut.

Tassalu Demokraatit oqallinnermut isummersuutigigallagaat.